



# Synfocity = 565

mail us at : [mzsynfo@gmail.com](mailto:mzsynfo@gmail.com); [mizoramynod@gmail.com](mailto:mizoramynod@gmail.com) - Phone - 2314648

3<sup>rd</sup> December, 2015

## □ Synod Inkhawmpui vawi 92-na tan dawn

Synod Inkhawmpui vawi 92-na chu December 8 - 13, 2015 chhung hian Tuikual Kohhran Biak Inah neih a ni dawn a, hemi hma hian Committee hrang hrang an thukhawm chho mek bawk.

Kumin Synod Inkhawmpui thlarau lam thupui hi 'Pathian chibai buk' (Johana 2:24) a ni a, December 12, 2015 (Inrinni) zanah Rev. Prof. C. Lalhlira, Principlal, ATC-in thlarau lam thupui hmang hian Pathian Thuchah a sawi ang.

Kumin 2015 Synod Inkhawmpuia Synod Puipa turte chu :

Moderator	:	Rev. H. Lalrinmawia
Secretaries	:	Rev. B. Sangthanga (Sr.) Upa H. Ronghaka (Jr.)
Finance Officers	:	Rev. Lalramliana Pachuau Rev. Dr. R. Lalbiakmawia
Statistician	:	Upa Vanengmawia
Executive Secretaries	:	Rev. Lalzuithanga Rev. P.C. Pachhunga

te an ni.

Synod Inkhawmpui hi kum 2010 atang khan Bial-in an thleng tan a, kum 2010 - ah Dawrpui Pastor Bialin Zarkawt Kohhranah thlengin kum 2011 khan Khatla Bialin Khatla Kohhranah an thleng a, kum 2012 khan Chanmari Bialin Chanmari Kohhranah an thleng leh a, kum 2013 khan Ramhlun North Bialin Ramhlun North Kohhranah an thleng a, kum 2014 khan Mission Vengthlang Bialin Mission Vengthlang Kohhranah an thleng a, kumin (2015) hian Tuikual Bialin Tuikual Kohhranah an thleng dawn a ni.

## Synod Inkhawmpui chhunga Traffic chungchang SP ruahmanna

1. Ni 8 atanga ni 13 December 2015 zing dar 8:00 atanga zan dar 9:00 chhung hian Tennis Court to Dinthar road hi One-Way a ni ang a, Tennis Court atanga tlan luh chauh phal a ni a, Dinthar lam atang chuan eng motor mah luh phal a ni lo.
2. Temple to Vaivakawn road, Tuichhunchhuah atanga Tuikual leh Dinthar inrina (Pu Rodney Lalrinawma In) thleng kawngpui sir zawng zawng hi Synod Inkhawmpui Palai te Motor dahna atana ruahman a ni a, Inkhawmpui Palai Motor lo chu dah phal a ni lo.
3. Sairang road, Upa H.Bata(L) In leh Upa Lalsangzuala Sailo (Holy Cross) In inkar kawngpui dung hi Synod Inkhawmpui chhung Dropping Zone atana ruahman tur a ni a, Motor eng chi mah dah phal a ni lo.
4. Tuikual Presbyterian Biak In hnuai Parking chu Synod Moderator leh Synod Puipate motor dahna tur a ni a, motor eng chi mah dah phal a ni lo.
5. Synod Inkhawmpui Palai motor kengten an motor-ah an Phone No. an tar ngei tur a ni.
6. Synod Inkhawmpui Palai Two-wheeler kengten Tuikual South YMA Hall-ah dah vek tur a ni.
7. Synod Inkhawmpui ni 8-13.12.2015 zing dar 8:00 atanga zan dar 9:00 chhungin Tennis Court - Dinthar (Kaisara Road)-ah eng lirthei mah dah phal a ni lo.

## □ Rb.H Kirloskar Hruaina Eng Quiz zawh a ni ta

November 5, 2015 zan atanga Synod Information & Publicity (Synfo) buatsaih Rb.H Kirloskar Hruaina Eng Quiz chu November 27, 2015 zan dar 7:30 khan Top 3 ten Final Round inelna an nei a, result puan leh lawmman semna neiin kharna hun hman nghal a ni.

November 20, 2015 khan Top 10 ten inelna an nei a, chung zing atang chuan Ramhlun Venglai, Khatla East leh Kolasib Diakkawn ten Final Round hi an lut a, Final Round thleng zo lo Branch 7 te hnenah Consolation Prize Rs. 3,000/- leh Citation hlan an ni. November 27, 2015 zan khan Top 3 ten inelna nei lehin an result hetiang a ni :

Pakhatna : Ramhlun Venglai  
Pahnihna : Kolasib Diakkawn  
Pathumna : Khatla East

Final Round-ah hian Jakoba, Kohhran Chanchin, Visual Round atangin inelna neih a ni.

Rb.H Kirloskar Hruaina Eng Quiz hi rampum huap Kohhran Pavalai Pawl puala buatsaih a ni a, Kohhran 99 lai an tel a ni. Quiz titha lawmmanah hian pakhatnain Rs. 80,000/-, Citation & Trophy, pahnihnain Rs.50,000/-, Citation & Trophy leh pathumnain Rs. 30,000/-, Citation & Trohy an dawng a ni.

Result puan hma hian Upa Biakchungnunga, Member, Synfo Comt-in hunserh a hmang a, Rev. Lalramliana Pachuau, Executive Secretary i/c Synfo in lawmthu sawina a nei a, Rev. Lalzuithanga, Senior Executive Secretary-in result puangin pakhatna lawmman hi a hlan nghal a ni. Pahnihna lawmman hi Upa Zonunmawia, General Secretary, Central KTP in a hlan a, pathumna lawmman hi Rev. R. Lalchangliana, Director, Synod Revival-in a hlan a ni.

## □ PC Girls

November 14 - 20, 2015 chhunga neih 19th International Children's Film Festival hmangin PC Girls School atangin Miss Malsawmdawngzeli leh zirlai 5 an kal.

November 14, 2015 tlai dar 5 ah opening programme neih a ni a, November 15 - 20 chhunginh movie hrang hrang, Children Film Festival puala film submit-te en thin a ni. Film-te hi naupang based a siam a ni deuh vek a, film thenkhat te chu director pawh naupang te te an ni a, a then chu Documentary Film te, Advertisement lam hawi te a ni a. Tlai lamah Cultural programme neih thin a ni bawk.

PC Girls' School zirlai atangin Lalhlimpuii chu Child Jury ah an la a, Child Jury hi group hrang hranga then an ni a. Lalhlimpuii te group hian Animation Film bik an endik a ni.

He Film Festival ah India ram mai ni lo, ram hrang hrang - Japan, Korea, Taiwan, China leh a dangte atangin Director leh chhimtu thahnem tak an lo kal a ni.

- ☐ **Pastoral Care & Counselling Training vawi 25-na khar**  
 Mizoram Synod, Family Guidance & Counselling Centre (FG&CC)-in Pastor-te puala November 18, 2015 atanga Intensive Residential Pastoral Care & Counselling Training vawi 25-na, Synod Conference Centre-a a buatsaih chu December 1, 2015 (Thawhle) zan khan 'Final Evaluation & Graduation Service' neiin khar a ni.  
 Training kharna hun hi Rev. Lalrimawia, Synod Moderator chuan a hmanpui a, training chhuakte hnenah Certificate semin thuchah a sawi. He Counselling Training-ah hian Pastor 16 an tel a, an zingah hian Phai Synod, Myanmar atangin Pastor 3 an rawn tel baw a ni.  
 Training kharna inkhawm hi Rev. R. Lalhmingthanga, Director, FG&CC-in a kaihrui a, Training chhuakte chuan training an hlawkpui dan a lema an ziak chu entirin an hrilhfiyah a, Rev. Lalparchhuana'n trainees aiawha thu sawiin, Durtlang Pastor Bial Zaipawl an zai baw a. Rev. J. Lalremsiama, Durtlang Bialtu Pastor chuan Training chhuakte tawngtaisakna hun a hmang.  
 He hun hmanpuitu, Synod Moderator Rev. Lalrimawia chuan training chhuakte fuihna thu sawiin, "Kohhran mite hi harsatna taw lo leh Counselling mamawh lo tak tak an awm lova, eng lai pawha chawm leh enkawl ngai reng an ni. Chuvangin inthlahdah lova, chawl lova kan thawh reng a ngai a ni" a ti a. Chumi atana Counselling Training buatsaih a ni thin chu lawmawm a tih thu sawiin, training chhuakte chu thahnemngai taka rawngbawlna chhonzawm zel turin a fuih.  
 FG&CC-in Pastor-te puala Pastoral Care & Counselling Training vawi 25 a buatsaih tawhah Pastor 423 training a neihpui tawh a. Tin, Church Leader-te puala kum 2002 atanga vawi 23 nei tawhah mi 455 Training pek an ni tawh baw.  
 Tin, Synod hian Counselling Centre paruk - Mission Veng, Chanmari, Vaivakawn leh Champhai Vengthlang, Kolasib leh Serchhipah te a nei a. Heng Counselling Centre parukah hian tun thlenga pantu (Client) an nei tawh zat chu 14,281 niin, kumin 2015 bikah pantu 3,146 an nei tawh baw.
- ☐ **Bible Sunday**  
 December 6, 2015 (Pathianni) hi Bible Sunday a ni a, Bible Society of India (BSI) zawmtu Kohhran hrang hrangten hemi pual hian programme an hmang ang. Presbyterian Kohhran chuan kum dang ang bawkin thupui pahni a siam a, Kohhran thenkhat tum hnih programme siam theite tan ruahman a ni. Inkhawm tum khat hmangte tan chuan thupui duh zawk zawk thlan mai tur a ni. Bible Society puala thilpek lak khawm tur a ni a, Tualchhung BSI Local Committee-ah emaw Branch Treasurer hnenah theh luh tur a ni.
- ☐ **PHBS Graduation Day vawi 56-na cum Silver Jubilee**  
 December 1, 2015 chawhnu dar 1:00 khan Presbyterian Hindi Bible School, Bawngkawn te chuan 56th Batch Graduation Day leh Silver Jubilee lawmna hun an hmang.  
 Programme hi Synod Mission Board Secretary Rev. Lalchhuanmawia'n inkhawm a kaihrui a, Rev. Vanlalbela'n lawmthu sawi leh tawngtaina hun a hmang baw. Presbyterian Hindi Bible School Principal Rev. John Sharma chuan inlawmna leh inhmelhriattirna hun a hmang a, Synod Mission Choir ten Pathian fakna hla an sa a, Pi Lalruatthangi PHBS zirtirtuin zirlaite result a puang a, Rev. C. Lalsangliana, Ramthar BEC member-in Certificate a hlan a, Upa Denghmingthanga'n tawngtaisakna hun a hmang baw. Synod Mission Board Coordinator Upa Lalrimuana'n report a e a, Rev. P.C. Pachhunga, Executive Secretary, i/c. Mission in thuchah a sawi a, Pension thlahna thilpek Pi Zirnuntluangi'n ahlan a, Rev. K.Lalthlanpuia Director, Masihi Sangati Kendra in lawmthu sawina hun a hmang a, Christian Centre Zaipawl te an zai baw a, inkhawm hi Rev. Darkhuma'n malsawmna in a tin a ni. Presbyterian Hindi Bible School, Bawngkawn, Aizawl hi Mizoram Synod Mission Board chungna hnam dang ringtharte rinna kawnga tihnghehna tura a din a ni a. August 24, 1990 khan hawn a ni a, September 15, 1990-ah zirlai hmeichhia 2 leh mipa 18, an vaiin mi 20 nen class tan a ni. Hun lo kal zelah Synod chuan India ram hmun hrang hrangah Mission Field a hawng ta zel a; chuvangin, State hrang hrang leh ram pawn - Nepal leh Bhutan atangte pawhin zirlai an lo kal thin. A din tan kum 1990 atanga thla thum course ni thin kha, 1998 atangin thla ruk course-a tihsei a ni a, kum khatah batch hnih nei a ni ta a ni. Kum 2009 atangin Synod-in a rel angin Certificate of Theology (C.Th.) ah up-grade a ni a, certificate dawngtute hi C.Th. pek an ni. Tunah hian seat 30 an nei bakah loh theih lohva lak (admit) ngai an awm reng thin.  
 Ramthar Commission Report 2015 chuan, Presbyterian Hindi Bible School (PHBS) hi kalpui zel tur leh, tuna course kalphung pangngai bakah Mission Field mite rawngbawltu nghet (Pastor) chherna atana upgrade ni se, tiin a rawt a. (Ramthar Commission, p. 39). Hengte hi tihpuitlin zel a nih chuan PHBS hi Synod rawngbawlnaah hian a la tangkai zual zel dawn a ni.
- ☐ **Synod Social Front-in Plumber Training buatsaih**  
 December 1, 2015 (Thawhle) chawhma dar 10:00 khan pipe fit thiam (plumber) training chu Zosaphluia Building Hall-ah Pathian hnena hlanna hun hman a ni.  
 Pathian hnena training hlanna function hi Upa Dr. Lalrimawia, Synod Social Front Executive Committee Member-in a kaihrui a. Pathian hnena hlanna leh thuchah tawi a sawi a, 'training-a telte chu beiseina nen malsawm tlaka hna thawk tur leh hlawhtling tur chuan tumruhna leh rinawmna a pawimawhzia te, bul tanna tha chuan a lian zawk a hrin thin zia te' sawiin trainee-te a fuih a.  
 Synod Social Front Coordinator Upa H. Lalhmingmawian Plumber Training ah buatsaih chhan a sawi a. Synod Social Front chuan Mizoten kut themthiamna kan inrochun piah lamah thalai hna neilote tan hna siam sak zel an ngaihpawimawhzia te a sawi a. Aizawl-ah ringawt pawh pipe fit thiam mite an indaih lo hle a, tuna a thiam sa, mi tlemte pawh an hmanhlel hle a, mithiam an lo pun zel hian ram leh khawtlang tan mi tangkai an pung zel dawn a ni,' tiin training-a telte chu mi hman tlak leh chhawru nuam, a ruaitute tana rawih man hla ni ngei se, a duh thu a sawi. Training hlanna hunah hian training kalphung turte inhrilhriat a ni a. Training chung atana hmanrua leh bungruate bakah chhun lama ei tur leh in turte pawh Synod Social Front hian a buaipui vek dawn a ni.  
 Plumber Training hi Synod Social Front-in a vawikhatna atan an buatsaih a ni a, December 1 - 14, 2015 chungna nei tura ruahman a ni. Trainee tura lak mi 13 in Zosaphluia Building kawt zawlah an training thin ang a, Theory-a an zir zawhah Practical-in an zir chhonzawm nghal ang. Ruahman lawk dan chuan training programme hi December 15, 2015 (Thawhle) zan dar 6:30-ah Synod Conference Centre, Pi Zaii Hall-ah kharna hun hman a ni ang.
- ☐ **Campus Ministry**  
 December 1, 2015 (Thawhle) khan Apollo Nursing School, Laipuitlangah hun an hmang a, December 4, 2015 (Zirtawpni) khian Health Worker Institute, Kulikawn Hmuntharah hun an hmang leh ang.
- ☐ **MTC**  
 December 2, 2015 (Nilaini) khan B. Miss final Year zirlai te Field Education nei turin Nepal Misison field-ah an kal.

☐ **Presbyterian Bible School Farewell and Dedication**

Presbyterian Bible School chuan December 1, 2015 chawhnu dar 1:00 khan 35th Session Farewell and Dedication Programme Pi Zaii Hall, Synod Conference Centre-ah an hmang.

Programme hi Synod Moderator Rev. Lalrinmawia'n inkhawm a kaihruai a, Bible chhiar leh tawngtaina te a hman zawhin Rev. R. Lalsawta'n inlawmna leh inhmelhriattirna hun a ahmang a. PBS Pncipal Rev. Lalneihvura'n reports a pe. Synod Finance Officer Rev. Dr. R. Lalbiakmawia'n zirchhuakte hnenah certificate a hlan a, NI. Ruthi CVL Muanpui'n Pathian fakna hla mawi takin a sa bawk.

Moderator-in zirlaite hlanna leh thuchah a sawi a, zirlai titha te leh Class kal kimte hnenah Upa C. Lalbiaktluanga, Board memberin lawmman a hlan a, Pu C. Awithanga Award pawh Pu C. Awithanga chhungten hlanna an nei bawk. Zirlai aiawh leh Pu C. Awithanga chhungten thu tawi sawina hun an hmang bawk. Synod Statistician Upa Vanengmawia'n zirlaite tana tawngtaisakna a nei a, Rev. Vanlalzuata'n lawmthu sawina hun a hmang bawk.

PBS-ah hian a din tirh atangin tun thleng hian zirlai 1628 an awm tawh a, chung zinga 1362 chu an passed a ni. Tuna session 35-naah hian zirlai 67 an awm a, 59 passed-in 4 an failed a, exam lo 4 an awm. Exam-a titha zual pathumna thlengin lawmman Rs.1000/-, Rs.700/-, Rs.500/- hlan an ni a, chungte chu:-

- 1st Vanlalhriatpuii D/o Chhawnkima, Venghlu Kohhran
- 2nd F. Lalnunpuia S/o F. Lalrithanga, Champhai Venglai Kohhran
- 3rd Linda Lalnunsangi D/o Dawngliana Lushai, Vaivakawn Kohhran

Session 35-na zirlai zingah hian kai kim 17 lai an awm a, an hnenah lawmman Rs.500/- theuh hlan a ni. Session tinin zirlai zingah Kristian Theology leh Kohhran Inrelbawlina & PCI Danpui subject-ahte hian a titha ber hnenah Pu C. Awithanga Award hlan thin a ni a, award hian pawisa fai Rs.1000/- a keng tel a ni. Award dawngtute chu:-

- 1. Kristian Theology - Vanlalhriatpuii D/o Chhawnkima, Venghlu Kohhran
- 2. Kohhran Inrelbawlina & PCI Danpui - Vanlalhriatpuii D/o Chhawnkima, Venghlu Kohhran

☐ **Music**

December 5&6, 2015 chhung hian Delhi West-ah Music Training neih a ni dawn a, training pe tur hian Synod Music Dept atangin Pu Lalromawia, Senior Music Instructor a kal ang.

☐ **Mission Board**

Synod Mission Board chuan Contract Missionary tur mi 98, mipa 40 leh hmeichhia 58 a la thar a. Thiamna lamah Post Graduate an awm laiin Under Matric mi engemaw zat an awm a ni. heng missionary lak tharte hian kum thar January 6- February 5, 2016 chhungin JM Lloyd Hall, Synod Office-ah Orientation Training an nei ang. Category hrang hranga an lak dan chu hetiang hi a ni.

Evan. Teacher	-	28
Evangelist	-	56
Craft Teacher	-	5
Staff Nurse	-	5
Health Worker	-	3
Gospel Team Member	-	1

☐ **Kum 2016 Puitling Sunday School Zirlaibu leh Synod Diary a chhuak ta**

Mizoram Presbyterian Kohhran chuan nakum 2016-a Puitling Sunday School zirlaibu tur leh Synod Diary chu a peihvel ve leh ta a, Synod Bookroom dawr hrang hrangah lei theihin a chhawp chhuak leh ta. Puitling Sunday School zirlaibu peih a nih hmai hian 2016 Nilai leh Beihruah thupui chu peihfel a lo ni tawh bawk a ni.

Puitling Sunday School zirlaibu hi Mizo lehkhabu malkhaiah chuan copy chhut chhuah tam ber a ni a. Kum 2016 atan hian copy 75,000 zet chhut a niin, nikum aia a copy punna hi copy 5,000 a ni.

Nakum 2016 hian Mizoram Presbyterian Kohhran chuan Puitling Sunday School-ah "Thlarau Thianghlim" tih an zir dawn a. He zirlaibu hi Presbyterian Pastor-te zinga Theology lama mithiam, Rev. Dr. Tlanghmingthanga ziah a ni a. Zirlaibu hi then 7-ah then a ni a, zirlai 47 awmin pheh 257 zeta chhah a ni bawk. Mizoram puma Synod Bookroom dawr zawng zawngah Rs. 100-a lei theih a ni ang.

Mizoram Presbyterian Kohhran Puitling Sunday School zirlaibu hi Mizoram Synod hnuai Kohhran zawng zawngte zirlaibu a nih bakah Presbyterian Church of Myanmar (PCM) hnuai Phai Synod pumpui chuan an zirlaibu atan an hmang ve nghal zel a. Presbyterian Church of Myanmar leh Mizoram Synod Partnership Agreement angin Mizoram Synod chuan kumtin Copy 1000 zet a thawnin Presbyterian Church of Myanmar hi a pe thin a ni. Hei mai bakah hian Myanmar-a Methodist Kohhrante chuan 2016 zirlaibu hi an zirlaibu atan an hmang ve dawn bawk.

Synod Diary 2016 pawh peihfel a ni tawh a, kumthar 2016 Synod Diary-ah hian rawtna angin Pathianni a full-a dah a ni a, Synod Bookroom hrang hrangah Rs. 120-a lei theih tura chhawp chhuah a ni bawk. Synod Diary ah hian PCI puipa te leh Statistics te, PCI hnuai Synod hrang hrang hruaitute, Mizoram Synod hnuai Presbyterian hrang hrang chhungah Bial awm te leh Kohhran awm zat te, Mizoram hnuai Dept hrang hrang leh thawktu zat te, Synod Mission rawngbawlina hmunte, Mizoram Synod hnuai phone number pawimawh zualte tarlan a ni a, Mizoram Synod hnuai Pastor leh Pro Pastor zawng zawngte biak pawh theihna phone number tarlan vek a ni bawk.

Heng bakah hian kum 2016-a Sunday School department hrang hrangte zir tur pawh peih fel vek tawh a. Synod Bookrooma-ah chhawp chhuah vek a ni tawh bawk.

☐ **Hruaina Eng FM Radio & TV Programme**

◆ **DECEMBER 4, 2015 (FM ZOAWI AIZAWL @ 7:30 P.M.):**

**Synod higher Secondary School Night**

◆ **DECEMBER 4, 2015 (FM LUNGLEI @ 7:30 P.M.)**

**Synod higher Secondary School Night**

◆ **DECEMBER 6, 2015 (Tv Programme) @ 3:00 p.m) :**

**Weekly Round Up, PBS : 35th Session Farewell & Dedication Service**

☐ **Susamachar Prasaran Programme**

◆ **DECEMBER 6, 2015 (Pathianni) 5:00 pm.:**

**Group/Choir/Solo** : Central PYF Choir - Krus Par, **Group/Choir/Solo** : Champhai Vengthlang Pastor Bial - Hamara Kal, **Sermon** : Rev Laltharzuala - Masib hamara Adarsh, **Group/Choir/Solo** : Himali Kohhran Zaipawl - Iisu Mash tere Jeisa Koi Nahi, **Group/Choir/Solo** : Kristian Centre Zaipawl - Tu Pyar Ka Sagar

## 2015 SYNOD INKHAWMPUI APROGRAMME

(8 - 13 December, 2015 @ Tuikual)

<p><b>December 8, 2015</b> (Thawhlelni)</p>	<p><b>9:30 a.m. – 4:00 p.m.</b> : <b>NOMINATION COMMITTEE</b> <b>6:30 p.m.</b> : <b>PATHIAN BIAK INKHAWM</b> Inlawmna leh Reports : 1) Mizoram Synod Choir 2) Chhiahtlang Bial Zaipawl</p>
<p><b>December 9, 2015</b> (Nilaini)</p>	<p><b>9:30 a.m. – 4:00 p.m.</b> : <b>SYNOD ROREL</b> <b>6:30 p.m.</b> : <b>PATHIAN BIAK INKHAWM</b> Thuhrlitu : Upa C. Thansiamia, Chanmari West, Aizawl : 1) Bungkawn Bial Zaipawl 2) Biate Bial Zaipawl</p>
<p><b>December 10, 2015</b> (Ningani)</p>	<p><b>9:30 a.m. – 4:00 p.m.</b> : <b>SYNOD ROREL</b> <b>6:30 p.m.</b> : <b>PATHIAN BIAK INKHAWM</b> Thuhrlitu : Rev. C. Lalbiakhluna, Republic Veng, Aizawl : 1) Dawrpui Vengthar Bial Zaipawl 2) Kelkang Bial Zaipawl</p>
<p><b>December 11, 2015</b> (Zirtawpni)</p>	<p><b>9:30 a.m. – 4:00 p.m.</b> : <b>SYNOD ROREL</b> <b>6:30 p.m.</b> : <b>PATHIAN BIAK INKHAWM</b> Thuhrlitu : KJP Synod Sepngi Palai Zaipawl : 1) Khatla Bial Zaipawl 2) Tuidu Bial Zaipawl 3) Darlung Bial Zaipawl</p>
<p><b>December 12, 2015</b> (Inrinni)</p>	<p><b>9:30 a.m. – 4:00 p.m.</b> : <b>SYNOD ROREL</b> <b>6:30 p.m.</b> : <b>PATHIAN BIAK INKHAWM</b> Thlarau lam thupui : 'Pathian chibai bûk' (Johana 2:24) Thuhrlitu : Rev. Prof. C. Lalhlira, Principal, ATC Zaipawl : 1) Presbyterian Choir, Lunglei 2) Mizoram Synod Mission Choir</p>
<p><b>December 13, 2015</b> (Pathianni)</p>	<p><b>:PASTOR NEMNGHEH LEH PRO. PASTOR DAHNGHEH INKHAWM</b> Thurin zawttu : Rev. Laldinthara, Ramthar Veng, Aizawl Thuchah sawitu leh : Rev. Ralthansanga Ralte, Tawngtai saktu Bethlehem Veng, Aizawl Zaipawl : 1) Ramhlun Bial Zaipawl 2) Hliappui Bial Zaipawl</p> <p><b>1:00 p.m.</b> : <b>LALPA ZANRIAH SAKRAMEN</b> Buatsaihtu : Rev. H. Lalrinmawia, Moderator Zaipawl : 1) Venghlui Bial Zaipawl 2) Suangpuilawn Bial Zaipawl</p> <p><b>6:30 p.m.</b> : <b>PATHIAN BIAK INKHAWM</b> Valedictory Sermon : Rev. Lalrinmawia, Moderator Kalchhuak Zaipawl : 1) Tuikual Bial Zaipawl 2) Mizoram Synod Choir</p>

### P.C GIRLS SCHOOL CLASS 'A' ADMISSION

PC Girls' School-ah Class 'A' Admission November leh December thla chungin hawn a ni e. Monthly fee a awm lo. Admission fee Rs. 550

**Headmistress**  
**P.c Girls School, Mission Veng**